


սիրեց մեզ, եկէք, մենք ևս մեր ձայնը միացնենք հրեշ-
տակների ձայնին և երգենք. «Փառք ի բարձունս Աստու-
ծոյ, և յերկիր խաղաղութիւն, ի մարդիկ հաճութիւն»:

Գերմաներէնից թարգ. Արսակ վարդապետ



ԾՆՆՆԵԱՆ ՏՕՆԸ ՀԱՅԵՐԻ ՄԷՁ

(Баку)

... Հայերի մէջ Ծնունդն ու Մկրտութիւնը մի և
նոյն օրը միասին, այսինքն յունուարի 6-ին տօնելու սո-
վորութիւնը ունի իւր պատմական հիմքը:


Ինչպէս վկայում են հայ եկեղեցու հայրերը և միւս
ազգերի ժամանակագիրները, քրիստոնէութեան առաջին
դարերում մինչև 5-րդ դարի սկիզբը այն ժամանակի
քրիստոնեայ բոլոր ժողովուրդները Քրիստոսի Ծնունդն ու
Մկրտութիւնը Հայերի պէս կատարում էին մի և նոյն
յունուարի 6-ին, Յետոյ մի քանի պատճառների հետեւան-
քով, այս կրկնակ տօնը բաժանուեց երկու առանձին տօ-
ների. Մկրտութիւնը յունուարի 6-ին, իսկ Ծնունդը տե-
ղափոխուեց դեկտեմբերի 25-ը:

Երուսաղէմի քրիստոնեաները նախկին կարգը փո-
խեցին այն պատճառով, որ նրանք մի և նոյն օրը պէտք է
կատարէին Ծննդեան տօնը Բեթղեհեմում, իսկ Մկրտու-
թեանը՝ Յորդանան գետում, որը շատ դժուարին էր լի-
նում, յիշեալ սուրբ տեղերի միմեանցից հեռաւորութեան,
ճանապարհների վատութեան և ձմրան ցրտերի պատճա-
ռով: Դրա համար Ծնունդը բաժանեցին Մկրտութիւնից
և տեղափոխեցին դեկտեմբերի 25-ը, որ հնար ունենան
այս տօները առանձին, պատշաճաւոր հանդիսաւորու-
թեամբ կատարել, ճոխ հանդերձանքով:

Լատիններն ու յոյները ուրիշ պատճառ էին առաջ բերում, առարկելով հեթանոսական սովորութիւնը, որ յարատեւում էր քրիստոնէութեան ժամանակ էլ: *

Նրանք սովորութիւն ունէին յունուարի 1-ին պատուել Յունուար կուռքի յիշատակը, իսկ փետրուարի 2-ին՝ Պրօզերպինա կոյսի յիշատակը, որին որպէս թէ դժոխքի աստուած Պլուտօնը առեւանգել է, ինչպէս պատմում է Հռոմայ Մարկոս Աւրելիոս կայսրը (գլ. XVI):

Հեթանոսական սովորութիւնները ժողովրդի յիշողութիւնից բոլորովին ջնջելու համար՝ յոյն և լատին եկեղեցիների հայրերը որոշեցին Յնունդը դեկտեմբերի 25-ին տօնել. ըստ այսմ՝ ութերորդ օրը, այն է յունուարի 1-ին՝ գալիս է Յիսուսի թլփատութիւնը, որով փոխւում է հեթանոսական Յունուարի տօնը, իսկ քառասներորդ օրը, Պրօզերպինա կոյսի յիշատակի օրը՝ գալիս է Տեառն ընդառաջը:



* Հռովմայեցիները դեկտեմբերի 17-ից մինչեւ 24-ը այլ հեթանոսական տօն էին կատարում. նոյն տօնը քրիստոնէականացնելու համար ծննդեան տօնը դիկտ. 28-ին սկսան տօնել: